

**Hutang 1MDB dapat dikurangkan dalam 5 bulan - Najib  
Astro Awani  
Ogos 09, 2015**

**PASIR GUDANG:** Beban hutang syarikat 1Malaysia Development Berhad (1MDB) mampu dikurangkan dalam tempoh lima bulan akan datang secara berperingkat.

Perdana Menteri, Datuk Seri Najib Razak hari ini berkata perkara tersebut telah dimaklumkan kepada ahli parti UMNO sebelum ini.

"Dalam masa 5 bulan akan datang ini, hutang 1MDB akan dapat dikurangkan kepada tahap yang jauh lebih rendah berbanding hari ini," katanya ketika berucap pada mesyuarat UMNO bahagian Pasir Gudang di sini, hari ini.

Menurut Najib, isu hutang 1MDB telah disensasikan di media sosial sehinggakan ia menjadi isu panas biarpun tiada kerugian yang dicatat syarikat pelaburan negara itu.

"Belum apa-apa lagi sudah meletup jadi panas, saya juga sudah mendidih sepanjang masa apabila ia jadi sasaran secara tiba tiba.

"Macam-macam cerita keluar di media sosial sedangkan siasatan masih berjalan, jadi ia tidak adil," kata Najib.

Menurut beliau lagi, 1MDB tidak mengalami sebarang kerugian ketika ini dan hutang yang ada akan dipulihkan melalui penjanaaan aset sedia ada.

Tambahnya lagi, selain laporan interim yang sudah sedia dibuat Jabatan Audit Negara, laporan akhir mengenainya akan dikeluarkan sedikit masa lagi sebelum diserahkan kepada Jawatankuasa Kira-Kira Wang Negara (PAC).

**© 2015 Astro Awani Network Sdn. Bhd. (535275-D) All Rights Reserved.**

Source: <http://www.astroawani.com/berita-malaysia/hutang-1mdb-dapat-dikurangkan-dalam-5-bulan-najib-69103>